



## **NUKINGINNARTOQ**

### **Aningaasaqarnermut Ataatsimiititaliap suliaq nr. 01.3106/07-00231 pillugu arfininngornermi ulloq 31. marts 2007-imi Naalakkersuisut ilisimatitsineq.**

(Naalakkersuisut ulloq 14. marts 2007-imi ataatsimiinneranni imm. 2a)

#### **Nummi GU-p allilerneqarnissaanut ilassutitut aningaasaliissutit**

##### **Naalakkersuisut inassutigaat.**

- kontomi pingaarnermi 80.00.00-imi, Sanaartornermut sillimmatinut agguanneqanngitsunut tunngasumi, meeqqanik inuusuttunillu paaqqinnittarfinnut 2007-2009-mut atugassaagaluit GU-p allilerneqarnissaanut atugassanngortinneqassasut.
- kontomi pingaarnermi 80.00.01-imi, Nuussinissamut sillimmatinut tunngasumi, aningaasaliissutit 2007-imi 1.000.000 kr.-inik ikilineqassasut.
- kontomi pingaarnermi 84.40.12-imi, Ilinniarfinnik sanaartornermut tunngasumi, aningaasaliissutit suliassaq nr. 060.52.027-imut, GU-p 2007-imi allilerneqarneranut tunngasumut, 1.000.000 kr.-nik amerlineqassasut.

##### **Aningaasaqarnermut Ataatsimiititaliap oqaaseqaatai**

Suliaq una 23. marts 2007-imi Aningaasaqarnermut Ataatsimiititaliamit siullermik suliarineqarpoq. Naalakkersuisulli qinnuteqaataat arlalinnik apeqquteqarnissamik pisariaqalersitsimmat ataatsimiititaliap suliame isummernissani kinguartippaa.

Naalakkersuisut akissuteqaataat ulloq 30. marts 2007-imi Aningaasaqarnermut Ataatsimiititaliamit tiguneqarput. Kontomut pingaarnermut 84.40.12-imut, Ilinniarfinnik sanaartornermut tunngasumut, missingersuutinut ilanngussaq iluarsisaq akissuteqaammut ilanngunneqarpoq.

”Periuseq 1” naapertorlugu ilinniarfiup 14,5 mio. kr.-inik akeqartumik 750 kvadratmeterinik allilerneqarnissaa siunertaralugu pilersarusiornissaq aningaasaliissuteqarnissamik qinnuteqaat matumani pineqartoq aqutigalugu qulakkeerneqarpoq.

Tamatuma saniatigut “Periuseq 4”-p sanaartornissaa Nummi GU-p allilerneqarnissaani Naalakkersuisut anguniagarigaat ataatsimiititaliap maluginiarpaa. ”Periuseq 4”-mi pineqarpoq 44 mio. kr.-it missaannik naleqartunik 2.100 kvadratmeterinik nutaamik sananissaq aammalu 400 kvadratmeterinillu allannngortiterinissaq. Ilinniarfiulli taama allilerneqarnissaanut 2007-imi aningaasanut inatsimmi aningaasaliissuteqartoqarsimannngilaq. Sanaartugassamut immikkut naatsorsuussatut aningaasaliussanik 2008-mut aningaasanut inatsisissatut siunnersuummut Naalakkersuisut immikkoortitsissanersut Aningaasaqarnermut Ataatsimiititaliap paasinissaa soqutigalugu qilanaaraa.

Kiisalu ”Periuseq 1” naapertorlugu sanaartornissaq piffissaq aammalu missingersuusiorneq eqqarsaatigalugit piviusorsioortuullunilu tamakkiisumik suliarisaasoq Naalakkersuisut qularutiginnikkaat ataatsimiititaliap maluginiarpaa. Naalakkersuisut

paatsuugassaannngitsunik oqaatigisaat ataatsimiititaliamit pingaartinneqarmat ”Periuseq 1”-p aningaasaliissuteqaqqinnissamik pisariaqartitsinani august 2008-mi naammassisinnaanissaata upperinissaa ataatsimiititaliap toqqarpaa.

Tusarniaanermut akissutit suliamik piareersaanermini Kultureqarnermut, Ilinniartitaanermut, Iisimatusarnermut Ilageeqarnermullu Pisorta qarfiup Ineqarnermut Attaveqarnermullu Pisorta qarfimmit kiisalu Aningaasaqarnermut Pisorta qarfimmit pissarsiariniarsimaneragaasa nuutinneri 23. marts 2007-imi aalajangiinermini ataatsimiititaliap qinnutigai. Tusarniaanivik ingerlanneqarsimannngitsoq pineqartorli tassaannerusoq pisorta qarfiit pineqartut akornanni paasissutissanik annertuunik paarlaasseqatigiissimaneq Naalakkersuisut maanna akissutaannit takuneqarsinnaavoq. Tamannalu tunngavigalugu tusarniaanermut akissutit kissaatigineqartut Naalakkersuisunit nassiunneqarsinnaasimangillat. Tusarniaanermut akissutinik nassiussinissap pisinnaannginnera pissutigalugu suliamut tunngasut pillugit nuutitat suliarineqarsinnaasimappata taakkuninnga Naalakkersuisut nassiussinissaat pitsaasimassagaluartoq Aningaasaqarnermut Ataatsimiititaliamit tikkuarneqassaaq. Suliali nukunginnaartuunera pissutigalugu atortussat kissaatigineqartut tigungninnissaat ataatsimiititaliamit akuerineqarpoq. Sulianili taamaattuni ataatsimiititaliap siunissami taama naammagittartigisarnissaa Naalakkersuisunit ilimagineqassanngimmat ataatsimiititaliamit erseqqissarneqassaaq.

Tamatuma saniatigut Naalakkersuisut isummernissamut tunngavissioinnissamut qaammatit arlaqartut atoreerat suliamik taama pitsaanngitsigisunik piareersarneqarsimasumik Aningaasaqarnermut Ataatsimiititaliap nukunginnartut suliarinnittariaqarnera naammaginangilluinnartut oqaatigineqartariaqarpoq!

Taamaalillunilu Naalakkersuisut akissuteqaataat ataqatigiinngitsunik ajornartorsiutinillu arlalinnik imaqqartoq ataatsimiititaliamit tikkuarneqassaaq:

- Allilerinissaq pillugu aalajangernissamut tunngavissap piareersarneranik sulineq Kultureqarnermut, Ilinniartitaanermut, Iisimatusarnermut Ilageeqarnermullu Pisorta qarfimmit 2006-imi kvartalit pingajuanni aatsaat aallartinneqarpoq. Aningaasanut inatsisissatut siunnersuummi tunngavissaatitaasumit allarluinnarmik annertuumillu akisunerusumik sananissaq Pisorta qarfiup suliarigaa 2007-imi aningaasanut inatsisissatut siunnersuummik suliarinninnermut atatillugu Inatsisartunut ersarissumik paasissutissiissutigineqarsimasariaqaraluarpoq!
- Nukungiussivallaartumik piffissamut pilersaarutissatut siunnersuut naapertorlugu sanaartornissap ingerlannissaa piviusorsioortuunersoq Aningaasaqarnermut Ataatsimiititaliap Naalakkersuisunut apeqqutigaa. Tassunga atatillugu aningaasaqarnermut piffissamullu tunngasut sanaartormik ilisimasalimmit naliliiffigineqarnissaat ataatsimiititaliamit kissaatigineqarpoq. Naalakkersuisulli taamaallaat akippit pilersaarutaaqqaartoq sanaartormik ilisimasalimmit avataaneersumik suliarineqarsimasoq. Sanaartormik ilisimasallip taaneqartup sanaartornissamut pilersaarummik suliaqartup pilersarusiaminik piviusorsioortutut imaluunniit taamani piviusorsioortuusutut isiginninnissaa ilimagisariaqarmat Naalakkersuisut akissuteqaataat akissuteqaataannngitsutut isigisariaqarpoq!
- GU-p allilerneqarnera piffissaq eqqorlugu naammassineqanngitsuussappat GU-mi ilinniartut inissinneqarnissaannut utaqqiisaasumik aaqqiissuteqarnissaq qulakkeerniarlugu ilassutitut aningaasaliissuteqarnissamik qinnuteqarnissaq Kultureqarnermut, Ilinniartitaanermut, Iisimatusarnermut Ilageeqarnermullu Pisorta qarfiup maanna pilersarusiulereeraa akissuteqaammi erseqqissumik allasimavoq. Nammineq suliamut taama tatiginninnginneq

toqqissisimanangilluinarpoq! Tamatuma saniatigut  
sillimaffiginnissimasinnaanginnissamik missingersuutitut inatsimmi piunasaat  
qinnuteqaataajunnartukut eqquutsinneqarsinnaangilaq!

- 2007-imi aningaasanut inatsimmi kommunini ulluunerani paaqqinniffinnut 2009 ilanngullugu aningaasaliussat aningaasaliissuteqarnissamik qinnuteqaatip matuma akuersissutigineqarneratigut peerneqassapput. Tamanna pillugu Kultureqarnermut, Ilinniartitaanermut, Iisimatusarnermut Ilageeqarnermullu Pisortaqarfik attuumassuteqartunut erseqqissaateqarsimanngitsoq ersarippoq. Tamatuma saniatigut toqqaannartumik allassimanngikkaluartoq akissuteqaammit takuneqarsinnaavoq 2008-mi ulluunerani paaqqinniffiliornissamut Namminersornerullutik Oqartussat aningaasaleeqataassuteqarnissaannut kommuninik qinnuteqartoqarsimasoq. Aningaasaliissuteqarnissamilli qinnuteqaammut atatillugu kommunit taakku pisariaqartitaat naliliiffigineqanngilluinnarsimasut ersarippoq!
- Kontomi pingaarnermi 20.11.61-imi ilinniartitaanermut sillimmatinit atuinikkut GU-mik allilerinissap immikkoortumi suliniutissanik allanik kinguartitsinermik kinguneqarnissaanik Naalakkersuisut paasisutissiissutaat itisiliivigineqassasoq Aningaasaqarnermut Ataatsimiititaliap qinnutigaa. Sillimmatinik taaneqartunik atuinikkut sanaartorerup ingerlanneqarnera "allat" ilinniartitaanerup immikkut ittumik suliniarfigineqarnerani ilaatinneqartut kingusinnerusumut kinguartinneqarnissaannik nassataqassasoq Naalakkersuisut akipput. Allatut oqaatigalugu akissut taanna aamma akissutaanngilaq/imaqanngilaq!
- 2008-mi ukioqatigiiat marluk 2008-2011-mi GU-mik ingerlatsinissaanni utaqqiisaasumik aaqqiissutaasinnaasunik isumaliutiginneqqullugit Naalakkersuisut Aningaasaqarnermut Ataatsimiititaliamit qinnuigineqarput. Meeqqat atuarfiannit anisut marloriaataanissaat ukiuni marlunni malunniuttussaasoq Naalakkersuisut akipput, taasa inuusuttut ilaasa GU-rtigatik efterskoleriarnissaat naatsorsuutigineqartariaqarmat. Tamannali ima paasisariaqarpoq ukioqatigiiat marluk taakku 2008 aallarnerfigalugu piffissami taaneqartumi agguataarumaartut. Allatut oqaatigalugu siunniunneqartutut annertutigisumik illutanik allilerinissaq immaqqa pisariaqartinneqanngilaq!

2008-mut aningaasanut inatsisissatut siunnersuummut kommunit sanaartugassanut kissaataat pillugit takussutissiap akissuteqaammi taaneqartup nassiunneqarnissaa Aningaasaqarnermut Ataatsimiititaliap naggasiullugu qinnutigissavaa.

Naalakkersuisut akissuteqaataata nuutinnera allakkanut ukununga ilanngussatut ilanngunneqarpoq.

### **Aningaasaqarnermut Ataatsimiititaliap aalajangiinera**

Siuliani allassimasut innersuussutigalugit Naalakkersuisut inassuteqaataat Aningaasaqarnermut Ataatsimiititaliamut **akuersissutigineqarput**. Tamatuma saniatigut siuliani oqaaseqaatinut Naalakkersuisut akissuteqaataata ullumimit ullut 14-it qaangiutsinnagit tiguneqarnissaa ataatsimiititaliamit qinnutigineqassaaq. Akissuteqaat kalaallisut danskisullu kiisalu qarasaasiakkut uunga nassuteqquneqarpoq: [nch@gh.gl](mailto:nch@gh.gl).

Inussiarnersumik inuulluaqqusillunga

Augusta Salling

## Aningaasaqarnermut Ataatsimiititaliap siulittaasua

Nuutinneri: Inatsisartut Kultureqarnermut Ilinniartitaanermullu Ataatsimiititaliaat  
Inatsisartut Attaveqaqatigiinnermut Ineqarnermullu Ataatsimiititaliaat